


B. N. C.
FIRENZE

1125

13



4425. 13

1125.13

300-3000

13

1125.13

APPIANI BONAFEDII

A. C.

DE CAELESTINI
GALIANI

ARCHIEPISCOPI THESSALONICENSIS

VITA

COMMENTARIUS.



FAVENTIAE MDCCLIV.

Typis Benedicti Impressoris Episcopalis necnon
Academiarum Remotorum, ac Philoponon.
Superiorum permissu.



HONORATORUM VIRORUM LAUDES
MEMORENTUR.

M. T. Cicero de Legibus Lib. II. 14.



Laris Viris usu saepe venit,
 ut posteaquam integritate
 morum & rerum praeclare
 gestarum gloria coercuerunt
 omnem invidentiam, demum pulsantur
 illo scommate, novos eos quidem esse
 homines, terrae filios, in trivio natos.
 Haec ferme abjectissima nota jam olim
Galiano iniusta est a male feriatis stem-
 matum quaesitoribus, quos per summam
 fatuitatem praeteribat ingenium solidae
 nobilitatis. Ut vero necesse non est
 occurrere istis ineptiis; ita fides histo-
 riae mittere omnino non sinit, Gentem
Galianam pro ingenua quadam iudicii
 rectitudine non jactare Senes illos inton-

fos cataclysmo lotos, aut iliaca flamma
 expolitos, nec atavos, ut ille ajebat,
 vetustate *dimidios & auriculis nasoque ca-*
rentes; sed purioribus ornamentis non
 destitui ingenio & virtute partis. Nam
Caelestinus Galianus an. MDCLXXXI. V.
 Kal. Octob. *Dominico Galiano & Caje-*
tana Turturellia Foggiae Apulorum em-
 porii civibus natus est in Apuliae Dau-
 niae pago, quo tum illi rusticabantur.
 Pronum vero esset in utraque familia &
 Episcopos censere & viros juris consul-
 tissimos & cives bonos atque probatos.
 Sed meo quidem arbitrio dementiae pro-
 ximum est, illum gentili, idest alie-
 na gloria onerare, qui propria disfluit.
 Projiciunt ampullas hujusmodi, qui suis
 nudas subreptis plumis ornant corniculas.
 Ille igitur sic, ut dictum est, ortus
 puerilem aetatem pueriliter, ut inter-
 pretor, transegit: non enim, quod ali-
 qui solent, prodigia confingimus in illa
 aetate. Imo nec memoramus puerum
 natum esse duobus dentibus instructum;
 quibus

quibus fortuitis naturae jocis genethliaca plebecula mirabiliter ineptiret. Nec diffitemur etiam rudius domi educatum dedisse nomen more majorum Caelestinae Societati, quae tametsi floureret praeclaris ingeniis, universim tamen, ut ea erant tempora, utebatur minus eleganti genere litterarum. Post absolutum tyrocinium in eadem Apulia Aletii olim Messapiae non ignobilis oppidi, nunc principis Hydruntinorum municipii, quo Philosophiae operam daret, tres annos confedit. Pythagorica & Elaetica disciplina, quae floruit jam pridem in illa vicinia, & Architae atque Ennii popularium gloria minimum juvit, quin tota regio per id temporis Barbarie squaleret. *Universalis, Entitates, formae, & Privationes* illepidi illa rudera detriti Aristotelis & rationis ludibria inquinabant Philosophiam. Crafioris minervae homines exultabant tricis & apinis. *Galianus* in ipsa animi pueritia acutius videns irascebatur: ut

demum gerris valere jussis, Graeculo quodam forte fortuna oblato ad litteras graecas confugerit. Sed quod fertur de *Ozanamio*, qui Astrologis illudens verius ipse per ludicrum, quam qui rem serio agebant, divinabat; id obtigit *Galiano*, qui Aristoteleorum quas irridebat argutias tanta solertia versabat jocando, ut obliniret eorum saepe ora, qui contriverant aetatem in illo ludo. Hisce cavillis nihil ille sua, multum tamen ingenio posse putabatur aliorum opinione. Jussus hinc Romam commigrare, ubi theologici studii causa ex universo sodalitie cogere lectissimos juvenes in more Gentis positum. Ibi Collegium, ut vocant, administrabat *Caelestinus Guicciardinus* vir frugi, summorum Pontificum benevolentia, Optimatum amicitias, opinione etiam purpurei galeri nobilitatus. In amoenioribus litteris atque in veteri juniorique historia apprimè versabatur, ut satis luculenter comprobatum ivit *Mercurio Campano* evulgato.

Rem

Rem vero theologicam quamvis attrigerat non oscitanter, coluerat eam tamen, quae jacebat eodem quo Philosophia deplorato fato. Videlicet divinarum originum & puriorum fontium religionis obliti Theologi Homines ad lutulentos rivulos deflexerant ut plurimum. Aristotelis & gregalium nubeculae de gradu dejecerant litteras sanctiores. Scholae atque Academiae bene multae iis disputationibus alebantur, quibus cum ignavia ingenium, cum levitate certabat asperitas. Disserebatur ad ravim, saeviebat salibus nigris, aer vapulabat, & quum nihil conficeretur deblaterando pulmonum denique vis triumphabat. Haec ferme obviam *Galiano* se tulit prostrata fortuna Disciplinae sanctioris. Conjici facile poterit an coxerit ingratias illas illecebras, ad quas natus non erat. Ut vero conquirebat undique servitutis solatia, avibus oppido bonis incidit in opera *Renati Cartesii*, quibus post *Nicolai Mallebranchii* exemplum vi-

debatur inesse vividam quamdam vim
 excitandi erigendique animi. Nam pro-
 ditum est memoriae, Mallebranchium
 fortuita lectione *Hominis Cartesii* exper-
 rectum ac veluti ictum ignoto quodam
 lumine tanto ambitu irruisse a semitis
 in viam, ut decimo anno cartesianae
 professionis *Inquisitionem Veritatis*, acre
 opus, absolverit, quo multorum rumor
 est vel acquasse, vel etiam superavisse
 Caput Gentis. Galianum non absimili
 contentione actum accepimus: multaque
 ingenii vi, multa labore improbo corri-
 puisse ex illo Philosopho, plurima vero
 Geometriae inopia aciem Hominis elu-
 fuisse. Hinc adjumenta, quae poterat,
 arcessere, & ut erat illi curta supellex,
 vel rem ipsam vestiariam extrudere, quo
 minerval penderet Geometrae Gallo.
 quam spartam ornabat ea vi, qua &
 noctes vigilaret ad ipsum mane & ci-
 baria negligeret & inferret labem sani-
 tati. Eam vero intemperantiam Soda-
 les quum vitio verterent, utebatur hoc
 apoph-

apophtegmate: *satius esse doctum emori,*
quam vitam curvi pecudis vivere. jam
 vero obfirmata ista sententia eo venit,
 quo non solum transmitteret arduam
Cartesii ubertatem, sed etiam lapsus cum
 retegeret, tum erigeret: quorum alte-
 rum erat acris, alterum liberi ingenii
 documentum. Ad haec *Mallebranchio* in-
 pso felicior, quod ille ab *Cartesii* com-
 mentationibus ebiberit umbras & en-
 thusiasmum, noster delibaverit mentem
 sanam & perspicuam. Per eos dies pro-
 dierant *Isaaci Newtoni Principia mathe-*
matica Philosophiae naturalis, & *Johan-*
nis Lockii Specimen de Intellectu. altero
 naturalis Philosophia, altero rationalis
 emendabatur. Enim vero *Galianus* e-
 merfit leni negotio a *Lockii* disputatio-
 nibus: & in usum contulit quod mode-
 rabatur audaciam ingenii: quod laede-
 bat jura Religionis sive licentia sive
 defectione diris devovit. Sed enim
 haud ita mature enatavit a *Newtoni*
 profunditate. Est enim illa Philoso-
 phia

phia non modo plena geometrici atque arithmetici negotii; sed novae *Fluxionum analyticae methodo*, ut *Newtonus* vocabat, seu *Calculo Differentiali*, ut *Leibnizius*, inaedificata, quæ Mathesis invisæ portenta tegebantur apud Transmarinos & Transmontanos arcana veluti disciplina, ut nihil primum dilaberetur ad Italos. Deinde relictis Novæ Geometriæ penetralibus a *Guillielmo Hopitalio* in *Analysi infinite parvorum*, perpauci adhuc erant in Italia, ubi tum mathematica studia frangebant, qui assurgerent ad ea culmina. Ea propter *Galiano* in ambage difficillima nonnihil hæsit aqua. Rem arduam communicavit qua sermone, qua litteris cum *Guidone Grandio* cumque *Manfrediis* Fratribus, tum italicæ Mathesis asyla. Lacertis vero maxime suis annis cum primis demum perdomuit indocilem calculi indolem. Cum *Prospero Lambertino*, nunc BENEDICTO XIV. quo cum multa illi erat consuetudo & con-

conjunctio, arbitror hoc etiam studii agitavisse; quum ex nupero epistolio Pontificis Maximi ad *Agnesiam* virginem lectissimam cognoverim, eum olim ingenio ad omnia facto sublimioribus etiam calculis delectatum. Illas salebras, quibus maxima pars hominum frangitur, quum sibi non tantum uni relictus complanasset, ut quasi jure Bernulliorum Fratrum de gloria quodammodo contenderet cum ipsis calculi inventoribus, via patuit quam latissima ad Nevvtonianas latebras, in quibus veluti alter Oedipus habebatur. Lucubrationes istae gravissimae non occupare modo Hominem poterant, sed obruere. attamen illi vacabat & versare animo consilia Theologiae repurgandae, & ad id evolvere authores idoneos cum veteres tum juniores: quam nec brevem, nec aequatam esse provinciam puto. Hinc iterare litteras graecas, hebraicas adjicere, rem criticam & diplomaticam, divinam humanamque antiquitatem; & quod influit in molem illam ingentem sacrae

Sa-

Sapientiae summa ope versare. In quibus equidem studiis tantundem enituit memoriae vi & soliditate judicii, quantum in Philosophia acumine ingenii. Quae duae res quum pro indolis discrimine & amplitudine coeant aegerrime, ut primum evolutae sunt in juvene, eo egerunt totum illud Collegium, quo ferme barbatulum acclamatione quadam traducerent ab auditorio ad cathedram. Permotus rei novitate & gratia, quo erat ingenio ad omnem liberalitatem composito, id ratus est sibi negotii dari, ut neminem poeniteret beneficii. In eam inde curam infedit, qua detergeret Scholae veterem squalorem, atque eodem ictu revocaret cum philosophica tum theologica studia ad elegantiorum fortunam. Quod elaboratissimis Institutionibus satis promte lucubratissimis vertit tam fauste & feliciter, ut brevi tulerit discipulos, qui vel aequaverunt ejus spem, vel etiam superaverunt tota via. Jam volebatur saeculi XVII. annus IX. quum ille

ille jussus more suae Gentis emergere a domestica umbra indixit diatribem theologicam: atque in lectissima concione & politiori Urbis frequentia disseruit de Dogmatibus theologicis, deque utriusque Instrumenti historia, ea varietate linguarum, critices severitate, eruditionis copia, atque etiam doctrinae novitate (si quorundam caliginem respicias) ut non injuria censeretur inter expolitores rei theologiae: in quam sententiam loquuntur non sine gratulatione italicae eorum dierum litterariae Ephemerides. At quae in virtutem coeca, in virtutis praemia oculata est invidentia adoritur Hominem. In invidentiae societatem venit praeposterus amor antiquitatis, quo jam olim creditum veritatem sine barba esse non posse. Principio clam feri coeptum in aures Procerum, cubare monstrum in illa disputatione. Ventum ad delationem. dies dicta. crimini datum, quod LXX. Senum interpretationem contemneret: quod imminueret Patri-

Patriarchas pone Diluvium: quod attenuaret Lucae auctoritatem: atque innocuum caput laboravit aliis commentis ejusdem furfuris, quorum pudet historiam. Jussus de se dicere tanta sapientiae varietate atque evidentia rerum causam egit suam, ut plus criminatione invidentium, quam laude bonorum profecerit. Certe post illam procellam in oculis omnium esse coepit. Qui Romae versabantur litterarum laude clari Homines *Lancisius*, *Fontaninus*, *Cappassius*, *Blanchinus*, *Gravina*, *Mirus*, atque in primis *Prosper Lambertinus*, cujus saepe nomen repeto, ut istud Commentariolum singulari gloria perfundam, ejus consuetudine utebantur familiarissime. Qui florebant nobilitate, qui etiam purpureis insignibus illius fidei credebant, quae adamabant impense, pignora familiae & senectutis: ita ut exhedram illius frequentarent, qui mox Cardinales amplissimi, Principum Legati, Provinciarum Praetores late enituerunt.

runt. Ii quoque, qui trans mare transque montes commigrabant in Italiam, honoris causa eum adibant, cujus nomen concefferat in ultimas usque terras. Ad thronum demum ipsum, quo aegre irrepsit vox litterarum, Viri fama percubuit. Tum summa rerum potiebatur CLEMENS XI. Is ut internoscendis erectioribus ingeniis admirabili erat acie arcessivit *Galianum*, & coercuit omnes impetus malevolorum indicto silentio. Eum continenter & invitabant & urgebant Veneta Respub. ad Patavinum Museum, & *Victorius Amodeus* ad Taurinam Academiam, ut Mathematicas profiteretur. Nullis vero abripi potuit blanditiis, quod argumento est regnum litteratum politicis quandoque regnis dominari. Sed veritus Pontifex, ne aureis demum promissis flecteretur, qui flecti non potuit honestissimis invitamentis, Romae substitit volentem: atque inusitato stipendio delegit ad Historiae Ecclesiasticae cathedram in Romana

mana Academia, quam Sapientiam vocant. Subinde ut perplexae & confragosa res oriebantur, *Galiano* indigere atque uti, nec puduit Pontificem sapientissimum, nec poenituit. Arbitrabatur enim, quemadmodum Principem decet, non ideo trans hominum sortem ingenio erigi qui eriguntur imperio. Differebatur an Romam intromittenda esset numeralis Sortitio, quam Genuensem appellabant, jucundissimum illud vectigalis genus. Erat de aleae aequitate dicendum. Corinthum istam adire non omnibus pervium. Cum *Galiano* asperioris arithmeticae calculis alto rem contulit Pontifex: utque de ludi indole & fortibus commentaretur, voluit. In *Arte conjectandi* argumentum exhaustisse Bernullium putabatur. Habuit tamen *Galianus* quod lucubrato Commentario subnecteret: quo versavit tam subtiliter rem omnem, ut satis veritati fecerit & Pontifici. cum iis etiam, qui depereunt hanc aleam, non vulgarem iniit gratiam,

am, quod paulo post aucta sunt prae-
mia victoriae. Inter haec Pontifex ex-
perimentis gravioribus *Galianum* exercu-
it in Mathesi: non ea quidem quae ini-
mica materiae visitat contemplatione,
sed quae vitae commodis servit & feli-
citati Reipub. De Padi Rhenique aquis
jamdiu cis transque Padani rixabantur
plus satis: nam agebatur de publicis for-
tunis. Concordia Gentium & malorum
levamenta identidem conquisita: consulta-
tiones & opera Hydrometrarum adhibita:
Johannes Dominicus Cassinus, & *Domi-
nicus Guillelminus* in deliberationem ac-
citi. Non defuerunt sumtus immanes,
non aegre tamen ferendi, si non defuisset
operae pretium. Sed jugiter oppu-
gnabatur calamitas, numquam expugna-
batur. Ne vero res eo rediret, quo
nec ferri mala nec remedia possent, qua
erat vigilantia Pontifex anno XVI. su-
pra MDCC. ut consuleret rerum per-
versitati Bononiam misit *Dominicum Ri-
verium* tum Praefulem ornatissimum,
B
mox

mox Cardinalem; eique aquarum curatori delecto a mathematicis consiliis adjecit *Galianum* & *Grandium*. *Eustachius Manfredius* Bononiensi S. C. ab usque anno MDCCIV. rei aquariae Praefectus vocabatur in partem maximam consultationum. Quum vero inauspicato res cessisset propter oppositas rationes finitimarum Gentium, quatuor inde annis repetitur. *Riverio* sufficitur *Rinuccinus*, quem idem Mathematicorum par comitabatur. *Latermannus* caesarianus administer, *Cappellus* venetarum partium curator, aliique legati atque artifices urbium, quorum non levia tum vertebantur momenta, concione coacti sunt. Publica res, ut par erat, publice & solemniter acta. Itum per omnes artis atque ingenii vias, quas laudati triumviri sternebant. Certe ille Isthmus fato quodam impenetrabilis non est effossus: satis tamen luculenter demonstratum, atque etiam finitum, Rheni aquas in Padum exoncratas nulli finitimarum

rum gentium nocituras. Sed reor Deo
 sospite BENEDICTO XIV. opus maxi-
 mum reservari, ut immortalium augeat
 facinorum gloriam Patriae vastitate de-
 leta. In istam enim vero curam con-
 tinenter sedet. atque secum excubat o-
 peri ingenio, quo valet plurimum, sedu-
 litate, aere, discrimine etiam suo *Geor-
 gius Cardinalis Doria*, quem honoris caus-
 sa nomino. Magna hactenus cum pe-
 cuniae vi, tum Hydrometrarum scitis
 (*Galiani* nunc etiam conquesta senten-
 tia) effossum est incile VIII. M. P. ob
 patriam caritatem Pontificis Maximi no-
 mine donatum, quo rectius dilabantur in
 Padusam Fossam aquae pluviae subsiden-
 tes & Rheni Idicisque stagna & eluvies
 hibernae atque aliae profluentes. A-
 qua elementum versipelle olim collusit
 graecas & romanas vires. Magno etiam
 huic operi adhuc immaturo fraudes quas-
 dam nexit. numeris vero suis absoluto
 irritos auguramur nivium atque imbri-
 um conatus: ut optimus Pontifex de

Isthmo perfosso deque Patriae luctu deter-
 to triumphum agat. Per idem tem-
 pus de aquis Clanis vetus discordia recru-
 duit inter Etruscos & Romanos. Me-
 moriae proditum, ab usque Tiberii ae-
 tate, quum Tiberis eluvies gravem Ro-
 mae labem intulisset, de remediis cogi-
 tatum: profluentes, quae tiberinas aquas
 augerent plus nimio, arcendas: Clanim
 praesertim detorquendum in Arnum, ut
 videlicet Florentiae perniciem Roma ser-
 varetur. Illa vero atque aliae Urbes,
 in quibus cudebatur eadem faba, quo
 disflarent procellam, urgebant lepidum
 genus argumentorum. Abactis fluvio-
 rum tributis Tiberini Patris gloriam
 comminutam canebant: polluta termi-
 nalia sacra, quibus suffragabatur ipsa
 natura: Diis fluvialibus deturbatis de Re-
 ligione plurimarum Gentium conclama-
 rum. Ut vero saepe numero commo-
 dius veneunt tricae, quam ipsae rationes,
 data Etruscorum verba Senatum de con-
 silio depulerant. Ad rem tamen dein-
 de re-

de repetitum. Solido muro, qui nunc etiam manet, duo montes conjuncti: interclusa vallis, per quam Clanis fluebat in Tiberim, facta in muro rima, qua arbitrio transmitteretur aqua. ALEXANDRO VII. Pontifice excitatae sunt veteres similtates, quibus leniendis contulerunt summam quidem, imparem tamen opem *Jo. Dominicus Cassinus, & Vincentius Vivianus*. Iterabantur eadem dissidia CLEMENTIS XI. diebus. Adimendis jurgiorum seminibus & consociandis voluntatibus in Etruriam primum solus deinde cum *Riverio Galianus* mittitur. Res minus prospere cessit propter exasperatas sententias. Sed quae ingenio vinci non potuit controversia necessitate reledit. Romam tandem regreditur abunde probatus praemiisque gravis plus etiam quam vellet, ut saepe urbano joco dicere consueverit: *O sanctas aquas!* Interea rerum studiis & nomine domi forisque clarus in Abbatum numerum cae-

lestino more cooptatur. Sed, residenti lege ab indulgentia Pontificis relaxata, Roma non excessit. ibique deinceps auctus procuratione negotiorum suae Gentis apud S. Sedem, qui ut in aliis, est in ea Societate magistratus luculentissimus: eoque non solèter modo, sed etiam eximie perfunctus os obstruit indoctis, qui litteratos Homines fatiscere curis civilibus oggannitunt. Atque haec ἐποχή quaedam est traducti Hominis a doctis ad politica studia. cui tamen transmissioni non ita ille haesit, ut non transfugeret aliquando ad veterem disciplinam. Quum vero in ingentem opinionem civilis prudentiae venisset, atque putaretur eadem acie & hyperbolas parabolisque metiri & viscera Reipub. cum saepissime a Primoribus, tum perpetuo ab *Alvaro* Cardinali *Cienfuegosio* adhibebatur gravissimis deliberationibus: in quibus fuit palmarium quòd de Siculae Monarchiae juribus jaetabatur. Nam ex veteribus iisque laxissimis concessionibus dimanavit quaedam series contentionum
inter

inter Romanam Sedem & Siciliae Reges, qui fartas tectasque tuebantur illas largitiones. Eas CLEMENS XI. aut rejecit qua falsas, aut qua veras rescidit. hinc defectiones & turbae. Post diurnam Iliadem malorum dedita sibi demum Sicilia *Carolus VI. Augustus*, qui cupiebat Religione magis augeri, quam imperio, aequioribus momentis librari controversiam apud BENEDICTUM XIII. *Cienfuegosio* edixit. *Prospero Lambertino* pendenda solertissime pontificia jura concredita: *Galiano* tradita augustea. Agentibus Ingeniis tam magnis, integra Principum amicitia, quae procella putabatur, soluta est in miram quamdam serenitatem. His experimentis in dies jacebat hebetior ea vox, non hominis illa quidem, sed bovis, eo videlicet ineptius erudita capita puerascere in rebus agendis, quo gravius senescunt in litteris. Ea propter eodem, quo acta res sicula, anno MDCCXXVIII. *Theodorus Carlius* popularis meus humanis di-

vinisque litteris & morum integritate
 spectatissimus, qui tum Caelestinorum
 fastigio potiebatur, eo remis velisque
 contendit, quo sibi magistratu abeunti
Galianum sufficeret. quod quum fauste
 feliciterque vertisset, qui satisfecerit
 muneri gravissimo publica non modo
 laude, sed etiam admiratione, interpre-
 tari proclivius arbitror, quam dicere.
 Illud certe incurrit in omnium oculos,
 quod ad Capitis exemplum compositis ar-
 tubus Societatis Caelestina Gens in mu-
 sas omnes politiores effusa est, quam
 quae maxime: clarisque postea ingeniis
 tam ubertim diffluit, ut magistros di-
 mitteret in principes Italiae Academias
 nullam Domi inopiam perpeffa. Labe-
 batur tertius illius Praefecturae annus,
 delatumque *Galiano* est, se ad Archiepi-
 scopatum Tarentinum vocari. Sive sin-
 gulari Hominis temperantia, sive inge-
 nio Tarenti, quod non ita Viris & bo-
 nis artibus affluit, ut piscibus, imposi-
 tam personam videbatur graviter ferre.
 Ut

Ut vero decebat Virum Religione penitissime institutum, conquievit Dei praepotentis arbitrio. Atqui Tarentum appellenti *Harracbii* Proregis litterae in iplo itinere redditae, quibus inscribebatur major Regni Aedituus. Repentino casu, ut fit, ictus primum haesit animo quid ineundum consilii: deinde Tarentum profectus partim *Caroli Augusti* clementia, partim invitamento Proregis, quocum intima illi familiaritas, acrius vero inopia eruditae consuetudinis permotus demum pedibus ivit in *Augusti* sententiam: atque Tarentino nomine cum Thessalonicensi commutato auctus splendidis insignibus Neapoli consedit. Accessit illi quoque Neapolitanae Academiae Praefectura, in quam *Augusti* iudicio, & litteratorum voto elatus utro afficeretur lautiore honestamento haesit anceps. Indubium hoc certe: rediisse tantundem ornamenti in dantes, quantum in accipientem emittebatur. Nam poterat illa quidem Academia fulciri

praefectura opulentiori: sapientiori vero non poterat. Afflicta tum illa ac ferme profligata jacebat: armorum strepitus & militaris licentia invaserat pulcherrimas aedes musarum, inque stativa converterat. Magistri extorres & pulsus auditorum grex alio se receperant miserum in modum. Accedebat penuria stipendiorum, quae saepe devolvebantur ad graecas calendas. Quum vero primum *Galianus* praefuit rei litterariae, insedit totus in eam mentem, ut litterae postliminio remearent ad notas sedes: obque viri auctoritatem deleti squalore bellico ac veluti Augusae stabulo repurgato post XXX. annum foedae profanationis Musarum Domicilium pristinae sanctitati restitutum dedicatumque est. Sterilibus subinde Cathedris resectis, aut quae veteres frugiferae erant mercedibus auctae, aut novae purioribus disciplinis evulgandis institutae. Vestigal etiam Academiae, idest basis & alimentum studiorum, amplificavit muneribus & hac

& haereditatibus, non subreptis captatione testamentorum, sed partis gratia & amicitiiis. Hinc reputavit animo honestiori facie illinire illam partem aedium compositam in hemicycli formam, ubi subeunt terribile quoddam arenae genus, qui de vacuis cathedris Candidati confligunt. Animum etiam convertit ad aulam mirae laxitatis, cujus absolvit ampla laquearia: & supremis vitae annis dabat operam pluteis in usum lectissimae Bibliothecae in illa aula constituendae publicae utilitati. Sed enim eo majorem gratiam iniit cum bonis omnibus, quod coegit Societatem Scientiarum Ingeniis clarissimis conflatam, Doctis machinamentis, Virorum Principum tutela, annuo etiam censu, quod caput est, communitam: qua forte Lutetiae ac Londino Neapolis non invisset, nisi avibus plane nigris rudimenta praeclari operis subruissent partim sodalium discessiones & facta incommoda, partim misera conflagratio omnium machi-

machinarum, ac belli denique apparatus.
 Caeterum strenui nifus gloriae ne hilum
 arbitror quidem detractum illa clade imo
 vero ex ipsa Societatis ruina id laudis
 mea quidem sententia accedit Institutori
 benevolo, quod confurgeret ex ipsa stan-
 te. Ut vero regrediar ad continentem
 rerum seriem, a qua persequendis illius
 Academiae fatis exorbitatum est, secun-
 do anno ab *Galiani* Neapolim appulsu,
 qui vulgaris calculi annus MDCCXXXIV.
Carolus Borbonius Philippi Hispaniarum
 Regis F. Neapolis & Siciliae Regna ju-
 re belli in deditiōem redegit. In illa
 vicissitudine fortunae ut magnifica sibi
 pollicebantur Hispanorum fautores; ita
 contabescebant trepido animo, qui Ger-
 manis partibus inhaeserant. Cum pri-
 mis *Galiano* austriacis beneficiis iisque
 recentibus elato ingruere calamitatem,
 iactabatur sermonibus publicis. Ille ve-
 ro, quod decebat Virum infontem &
 sapientem, nihil veritus atque etiam hi-
 laris in omni fortuna amicorum quere-
 las

las de instanti discrimine compressit memorabili verbo. *Splendidis hisce* (inquit) *impedimentis excussi nihil amittimus solidae felicitatis, Amici. modo cella apud veteres Sodales librique sint reliqui, in vado res est.* Magno hoc animo quid de sua sorte Hispanus moliretur, ne cogitabat quidem. Ipsa Hominis apathia ipsaque spectata erga Austriacos fide Rex *Carolus* permotus non modo illum non deturbavit, sed gravi consilio ratus e re tantam virtutem adducere in suas partes eum excepit amica verius, quam regia comitate: cum a sacello confirmavit, tum a consiliis delegit, atque fatidico prope animo devovit futuris Regni casibus. Subinde ea fuit in illum Regis benevolentia eaque opinio sapientiae & probitatis, ut praeter ambitiosum ingenium & aulicam animam nihil videretur defuisse ad summas fortunas. Tribus annis post occupatum Regnum ab Hispano Milite oneratus regiis negotiis Romam mittitur. Primum

mum agebatur de possessionis capiendae
 venia Regi *Carolo* impetranda a Ponti-
 fice. Ardua res ac plena aleae: quum
 non adhuc irae deferbuissent Austriacos
 inter & Hispanos. Explicita tamen
 compendio est. Inde itum in implicatio-
 ra. Inter Romanam Sedem & Neapoli-
 tanos Reges de juribus utriusque Potesta-
 tisolvebantur nodi supra modum per-
 plexi, quos post plurima facta pericula
 ineundae concordiae putabatur scindi po-
 tius, quam explicari posse. Cum enim
 perdifficilis est omnis quaestio de finibus,
 qui terminantur linea quadam geometri-
 ca, tum difficillima est ubi disputatur
 de finibus authoritatis. CLEMENTE
 XII. Pontifice complanandis rerum aspe-
 ritatibus coactus est conventus amplissi-
 mus, sed re infecta dissolutus est sive pro-
 pter obitum Pontificis, sive propter i-
 psam ambagem. Jam vero christiano
 nomini auspiciatissimo anno XL. supra
 MDCC. quippe quo principis orbis terra-
 rum sublellio confedit nihil tale cogitans

BE-

BENEDICTUS XIV. P. M. Romam *Galianus* remigravit ab Neapolitano Rege quam latissima agendi facultate insignitus. Illum Pontifex suis genibus ad-volutum complexus ut veterem familia-rem, quæ sua facilitas est, privatis pri-mum alloquiis adhibuit: postea de gra-vissima jurium quaestione cum *Sylvio Valente Gonzaga*, cum *Trojano Aquavivio*; Cardinalibus ornatissimis, cumque ipso *Galiano* differendo, jactatissima illa inter utramque Potestatem *Concordia* bre-vi sublatum est vetus dissidium; quo jamdiu omnis ferme hominum pruden-tia fatiscebat. Quum vero facile eve-niat in his disputationibus, ut hinc pa-retur benevolentia, illinc invidia, pro-digio cuidam tributum, quod *Galiani* in-tegritas neutri parti displicuerit. Nam & humanissime & plausu quodam a Re-ge Carolo exceptus instituendi tum Or-dinis Equitum S. Caroli Magnus Can-cellarius, ut vocant, deligitur, atque stipendio conduplicato praeficitur novo

Judi-

Judicum Collegio, quod *Mixtum* dicunt: & illud etiam accepimus circumlatum opinione publica, Pontificem maximum cogitantem explere Cardinalium Senatū Viris religione, autoritate, sapientia clarissimis intentos oculos in *Galianum* convertisse. Quid vero interciderit rei, quominus id prospere verterit, non una sententia est. Alii narrant, ut sunt hominum divinationes, politica momenta, alii Candidati abstinētiā. Mihi nec hariolari placet, nec decet. Tres cum post haec annos regiis negotiis implicitus transegisset, non alienam modo, sed lepidam etiam personam suscepit. Jam illum litteris aula subduxit: mox bellum subripuit & litteris & aulae. Posteaquam enim constituit Rex Carolus Veliterno bello non praeesse solum, sed interesse, sive propter pietatem, quam non omnes milites contemnunt, sive propter mathematicas disciplinas, quae perinde domi atque militiae contemni non possunt, *Galianum* in comitatu se visurum liben-

libenter significavit. Quod ubi delatum est, non ille umbratili vita emollitus concidit animo: sed laetus jocusque etiam Socratis & Xenophontis exemplis se dedit in bellicum comitatum. Quinque minimum menses ad Velitras consedit: periclitatus est etiam: & decursionibus hostium direpta domo caruit supellectile, quae regia largitate e vestigio instaurata est. Hoste demum amoto Romam religionis ergo venit cum Rege, atque cum illo Neapolim revertit inter omnium ordinum acclamationes. Ibi summo in honore nonum jam annum haerebat, quum capite, quod vitiaverat labore improbo, coepit conflictari. Vel morbo, vel remediis gravius ruit in dies. Ut vero sensit urgere mortalitatem in Religionem, quam bene valens impense coluerat, impensius etiam moriens effusus; atque supremis sacris confirmatus apoplexia ictus animam egit VII. Kal. Quintil. anno D. Ae. MDCCLIII. aetatis suae LXXII. Haeredes

des scripsit ex asse Fratris filios duos: qui se tamen plus amant in patrum institutione & gloria, quibus & docti sunt & clari, quam in ipsa haereditate. Corpore fuit ille procero, colore subnigro, brevi fronte ac prominenti, late pilosis superciliis, quibus nonnihil asperabatur ingenua quaedam oris dignitas. Ingenio utebatur recto & acri, memoria incredibili, ut magis videretur indigere oblivionis arte, quam memoriae, quod de Themistocle dictum est. Laboris patiens & vigiliarum flexerat animum ad omne disciplinarum genus. Maximam vero operam navaverat naturae & Religioni. Polyhistor & universim audiebat & erat: ut vir gravis *Eustachius Manfredius*, si quando de *Galiano* intercideret sermo, dicere consueverit: Mathematicas disciplinas minimum esse quod *Galianus* calleret. neminem se vero novisse, qui vel illum in Mathesi antecelleret, vel etiam coaequaret. Nec flagrabat gloriolae cupidine, nec zelotypia:

pia: quae duae aegritudines magna saepe Ingenia labefactant. Maluit esse doctus, quam videri: & si quod novum hauriebat fundo suo procul ab aegypto mysterio prodigebat. Pythagorico & socratico exemplo nihil usquam gentium, ne vexatus quidem, typis edidit in vulgus. partim quod improbabat scriptitandi cachoetem, quo plus mole, quam momento crescit supellex libraria: partim quod pro singulari pudore verebatur litterata praelia & publica suffragia. Quod impervium ferme in homine mathematico, loquebatur & eleganter & multum, ut loquax taciturnis diceretur. Sed illa copia manabat a pectore docto & bibliothecam jugiter sapiebat. Non affectabat granditatem stoicam nec frontem caperatam, qua tenues animae contegunt levitatem. Sed quum saepe mente peregrinaretur, ut obvios nec salutarer, nec videret, qui cute tenus eum nove-
rant, fastum rebantur illam alienationem. Caeterum cum Amicis comis & elegans
urba-

urbanis salibus delectabatur tam alacriter atque venuste, ut videretur curis vacuus & natus ad omnem leporem. Inimicitiarum, si quae erant, minimum anxius splendidas & certas amicitias putabat ditissimum lucrum. Maxime vero exultabat duplici gloria. cum Sylvii Valentis Gonzagae necessitudine, tum clementia BENEDICTI XIV. quorum alterum civilis prudentiae lumen, alterum saeculi & ingeniorum prodigium, ut res est, perpetuis verbis nominabat. Eximia erat erga Regem fide: & munere defungebatur suo non sancte modo, sed etiam superstitiose, si qua modo est in officiis superstitio. Nec querulus fuit, nec petitor, ut in aula. Proinde visus minus commodus amicis, sibi que nullum quaestum, nisi sponte oblatum, fecit. Decessit tamen dives: plus fortasse, quam Philosophum, minus certe, quam aulicum decebat.

FINIS.

2

1105.15

85.561035

1128.13





Mei

